




# ხაშურის მთაშვე



№32 (162)

13 აგვისტო, ორშაბათი,

2018 წელი

## სამშობლოსთვის დღუპუღთა სფღღავუბი გვირგვინით შუამკვეს

საქართველოს უახლესი ისტორიის ერთ-ერთი ყველაზე ტრაგიკული დღიდან ათი წელი გავიდა. 2008 წლის აგვისტოს ომის დროს გმირულად დაიღუპნენ სამშობლოსთვის მებრძოლი ვაჟკაცები, მათ შორის ხაშურის მუნიციპალიტეტიდან.

მუნიციპალიტეტის მერმა გიორგი გურასაშვილმა, მუნიციპალიტეტის საკრებულოს თავმჯდომარემ მიხეილ ჯანაშვილმა და მუნიციპალიტეტის წარმომადგენლებმა 2008 წლის აგვისტოს ომის დროს გმირულად დაღუპულ მებრძოლთა საფლავები და საქართველოს ტერიტორიული მთლიანობისთვის დაღუპულთა მემორიალი გვირგვინებით შუამკვეს.

ვახტანგ გორგასლის მესამე ხარისხის ორდენის კავალერი -კაპრალი დავით ბლიაძე ქეიშხეთშია დაკრძალული, კაპრალი ზაურ მახარაშვილი, რომელსაც გარდაცვალების შემდეგ მედალი "მხედრული მამაცობისთვის" მიენიჭა, მისი მშობლიური სოფლის - ოსიაურის სასაფლაოზეა დაკრძალული, ვახტანგ გორგასლის პირველი ხარისხის ორდენის კავალერი კაპრალი გიორგი წიქარიშვილი კი თბილისის ძმათა სასაფლაოზე განისვენებს.

"აგვისტოს ომის გმირების სიმამაცე და თავდადება სამაგალითოა თითოეული ჩვენგანისა და მომავალი თაობებისთვის",- აღნიშნა მუნიციპალიტეტის მერმა.

აფხაზეთისა და ცხინვალის რეგიონების უკანონო ოკუპაციის მიზნით, რუსეთის ფედერაციის მიერ საქართველოში განხორციელებული ფართომასშტაბიანი სამხედრო ინტერვენციის შედეგად დაღუპულთა ხსოვნის პატივსაცემად, სახელმწიფო და მუნიციპალიტეტის დროშები, 8 აგვისტოს, დაშვებული იყო.



## ხაშურის მუნიციპალიტეტის საკრებულო

### განკარგულება №77

2018 წლის 7 აგვისტო, ხაშური

#### საქართველოს პრეზიდენტის 2018 წლის 28 ოქტომბრის მორიგი არჩევნებისათვის, ხაშურის მუნიციპალიტეტის ტერიტორიაზე წინასაარჩევნო შეხვედრების ჩასატარებლად, სააგიტაციო მასალების გასაკრავად და გამოსაფენად ადგილების გამოყოფის შესახებ

საქართველოს პრეზიდენტის 2018 წლის 1-ლი აგვისტოს №01/08/02 განკარგულებით გამოცხადდა საქართველოს პრეზიდენტის მორიგი არჩევნების თარიღი. საქართველოს ორგანული კანონი „საქართველოს საარჩევნო კოდექსის“ 46-ე მუხლი აწესებს ცალკეულ შეზღუდვებს, კერძოდ, კრძალავს სააგიტაციო მასალების საკულტო ნაგებობებზე, კულტურული მემკვიდრეობის შენობა-ნაგებობებზე, სახელმწიფო ხელისუფლებისა და ადგილობრივი თვითმმართველობის ორგანოების, სასამართლოების, პროკურატურის, სამხედრო შენაერთების, პოლიციის, საქართველოს სახელმწიფო უსაფრთხოებისა და დაზვერვის სამსახურების და სახელმწიფო დაცვის სპეციალური სამსახურის დანაყოფების შენობების ინტერიერებსა და ექსტერიერებში, აგრეთვე საგზაო ნიშნებზე განთავსება/გაკვრას. იმავედროულად ადგილობრივი თვითმმართველობის ორგანოებს ავალდებულებს წინასაარჩევნოდ უზრუნველყონ თითოეული პოლიტიკური პარტიის, საარჩევნო სუბიექტის თუ კანდიდატის სააგიტაციო პროცესის წარმართვის შესაძლებლობა და განსაზღვრონ ადგილები ან/და დადგან სტენდები სააგიტაციო მასალების თვალსაჩინო ადგილებზე გასაკრავად, რათა ამომრჩევლები ინფორმირებულები იყვნენ თითოეული საარჩევნო სუბიექტის პროგრამისა და პლატფორმის თაობაზე.

ყოველივე ზემოაღნიშნულის გათვალისწინებით, ხაშურის მუნიციპალიტეტის საკრებულო მიზანშეწონილად მიიჩნევს დაკმაყოფილდეს ხაშურის მუნიციპალიტეტის მერიის თხოვნა და გამოიყოს ადგილები ხაშურის მუნიციპალიტეტის ტერიტორიაზე წინასაარჩევნო შეხვედრების ჩასატარებლად, სააგიტაციო მასალების გასაკრავად და გამოსაფენად.

საქართველოს ორგანული კანონის „ადგილობრივი თვითმმართველობის კოდექსის“ 61-ე მუხლის 1-ლი და მე-2 პუნქტის, საქართველოს ორგანული კანონის „საქართველოს საარჩევნო კოდექსის“ 45-ე მუხლის მე-9 პუნქტის, 46-ე მუხლის მე-4 პუნქტის და საქართველოს კანონის „საქართველოს ზოგადი ადმინისტრაციული კოდექსის“ 61-ე მუხლის შესაბამისად, ხაშურის მუნიციპალიტეტის საკრებულო ადგენს:

1. გამოიყოს ადგილები ხაშურის მუნიციპალიტეტის ტერიტორიაზე წინასაარჩევნო შეხვედრების ჩასატარებლად, სააგიტაციო მასალების გასაკრავად და გამოსაფენად, დანართი №1-ის შესაბამისად (დანართი №1 თან ერთვის);
2. ამ განკარგულების 1-ლი პუნქტით გათვალისწინებულ ადგილებში საარჩევნო სუბიექტებმა უზრუნველყონ საკუთარი სააგიტაციო მასალების გამოკვრა იმ ფორმით, რომ დაცული იქნეს წინასაარჩევნო კამპანიაში (აგიტაციაში) მონაწილე ყველა საარჩევნო სუბიექტის თანაბარი შესაძლებლობა ისარგებლოს სააგიტაციო მასალების გამოსაკრავად განკუთვნილი ადგილებით;
3. ამ განკარგულების 1-ლი პუნქტით გათვალისწინებულ ადგილებში საარჩევნო სუბიექტების მიერ გასაკრავი საარჩევნო პლაკატების მაქსიმალური რაოდენობა დგინდება შესაბამისი ადგილის ფართობის გათვალისწინებით;
4. ამ განკარგულების 1-ლი პუნქტით გათვალისწინებულ ადგილებში საარჩევნო სუბიექტს უფლება აქვს გააკრას საარჩევნო პლაკატი შემდეგი

ზომებით: სიგრძე არაუმეტეს 60სმ, სიგანე არაუმეტეს 42სმ ( 2 ფორმატით);

5. ამ განკარგულების 1-ლი პუნქტით განსაზღვრულ ადგილას, საარჩევნო სუბიექტების მიერ გასაკრავი საარჩევნო პლაკატების მაქსიმალური რაოდენობა ერთ საარჩევნო სუბიექტზე განისაზღვროს 1 ცალით;

6. ძალდაკარგულად გამოცხადდეს „ხაშურის მუნიციპალიტეტის ტერიტორიაზე წინასაარჩევნო შეხვედრების ჩასატარებლად, სააგიტაციო მასალების გასაკრავად და გამოსაფენად ადგილების გამოყოფის შესახებ“ ხაშურის მუნიციპალიტეტის საკრებულოს 2017 წლის 10 აგვისტოს №67 განკარგულება;

7. განკარგულება აღსასრულებლად გაეგზავნოს ხაშურის მუნიციპალიტეტის მერიას;

8. განკარგულება ძალაში შედის ხაშურის მუნიციპალიტეტის საკრებულოს ვებ-გვერდზე [www.khashuri.org.ge](http://www.khashuri.org.ge) გამოქვეყნებისთანავე.

9. განკარგულება შეიძლება გასაჩივრდეს დაინტერესებული პირის მიერ, სარჩელის წარდგენის გზით, მისი გაცნობის დღიდან ერთი თვის განმავლობაში, ხაშურის რაიონულ სასამართლოში (მისამართი ხაშური, კოსტავას ქ.№15).

საკრებულოს თავმჯდომარე

მიხეილ ჯანაშვილი

დანართი №1

#### ხაშურის მუნიციპალიტეტის ტერიტორიაზე სააგიტაციო მასალების გასაკრავად შერჩეული ადგილები

ხაშურში:

1. ხაშურის საქალაქო კულტურის ცენტრის ე.წ რკინიგზის კულტურის სახლის მიმდებარე ტერიტორია.
2. ადგილობრივი მნიშვნელობის გზებზე განთავსებული ღამის განათების ბოძებზე, 3 მეტრის სიმაღლემდე დაშვებით, მაგრამ ბოძზე დამონტაჟებულ კვანძებთან, სადენებთან და სხვა ელ. მოწყობილობებთან, არაუმეტეს, 1 მეტრის სიახლოვისა.

დაბა სურამში:

1. კინოთეატრის მიმდებარე ტერიტორია;
2. კოსტავას ქუჩაზე მდებარე კულტურის სახლის მიმდებარე ტერიტორია;
3. ადგილობრივი მნიშვნელობის გზებზე განთავსებული ღამის განათების ბოძებზე 3 მეტრის სიმაღლემდე დაშვებით, მაგრამ ბოძზე დამონტაჟებულ კვანძებთან, სადენებთან და სხვა ელ. მოწყობილობებთან, არაუმეტეს, 1 მეტრის სიახლოვისა.

მუნიციპალიტეტის სოფლებში არსებული ე.წ ყოფილი სოფლის კულტურის სახლების, კლუბების და მათ მიმდებარე ტერიტორიაზე, აგრეთვე ადგილობრივი მნიშვნელობის განთავსებული ღამის განათების ბოძებზე 3 მეტრის სიმაღლემდე დაშვებით, მაგრამ ბოძზე დამონტაჟებულ კვანძებთან, სადენებთან და სხვა ელ. მოწყობილობებთან, არაუმეტეს, 1 მეტრის სიახლოვისა.

ხაშურის მუნიციპალიტეტის ტერიტორიაზე საარჩევნო სუბიექტების მიერ შეიძლება საარჩევნო ღონისძიებები ჩატარდეს შემდეგ შენობებში:

ხაშურში:

ხაშურის მუნიციპალიტეტის სკოლისგარეშე სახელოვნებო დაწესებულებების სამუსიკო სკოლების გაერთიანების შენობა, მის: ხაშური, თამარ მეფის ქ. №1.

დაბა სურამში:

1. კოსტავას ქუჩაზე მდებარე კულტურის სახლი.
- მუნიციპალიტეტის ადმინისტრაციულ ერთეულებში:  
სოფლის ყოფილი კულტურის სახლებსა და კლუბებში.

# ხაშური და რუსული ინტერვენცია (2008 წლის აგვისტო-სექტემბერი)

მკითხველისადმი წინამდებარე მცირე რამ ნაშრომი იმ დიდი ტრაგედიის ანარეკლია, რაც რუსეთმა დამართა საქართველოს 2008 წლის აგვისტო-სექტემბერში. რამდენიმე ფურცელი, ბუნებრივია, ვერ დაიტევს იმ ტკივილს, რაც ჩვენმა ერმა განიცადა, მაგრამ წარმოდგენას მაინც შეგიქმნით რუსეთის აგრესიაზე.

საქართველო რუსეთისათვის მუდამ იყო საჯილდო ქვა. ერთმორწმუნე რუსეთის მფარველობა თავიდანვე შეცდომა აღმოჩნდა. არაერთი ქართველის სიცოცხლე შეეწირა 1921 წლის ანექსიას, სხვადასხვა წლების აჯანყებებსა და გამოსვლებს.

„უფროს ძმას“ ყოველთვის ყელზე ადგა თავისუფლები-სმოყვარე ქართველი ერი. ამიტომაც, სამაგალითოდ გვსჯიდნენ. ასე



იყო 1924-1937 წლებში, 1956 წლის 9 მარტს, 1989 წლის 9 აპრილს. 15 წლის წინანდელმა გენოციდმა კი ლიბო მოურღვია აფხაზეთსა და სამაჩაბლოს ქართველობას. აგვისტოს მოვლენებით კი რუსეთმა დიდი ხნის წინანდელი ოცნება შეისრულა: შავი ზღვისპირეთის ნაწილი (აფხაზეთი) და შიდა ქართლის ნაწილი (სამაჩაბლო) სრულიად მოწყვიტა დედასაქართველოს.

ომის დღეებში, საქართველოს ბანკში გაიხსნა კონფლიქტში დაზარალებული მოსახლეობის დახმარების ფონდი (საქართველოს ბანკი 44-44-44). ტყვეების, კონფლიქტის ზონაში დარჩენილი მოსახლეობისა და მარადიულობის შესახებ შეიქმნა ცხელი ხაზი (8(22)98-94-51).

რაიონული კომისარიატის ცნობით, აგვისტოში ხაშურის რაიონიდან გაწვეული იყო 280 რეზერვისტი.

საავადმყოფოები შეუფერხებლად დებულობდნენ და მკურნალობდნენ დაჭრილებს. სადგურ ხაშურის საკვანძო ქირურგიულ განყოფილებაში გატარდა აგვისტოს საომარ მოქმედებასთან დაკავშირებული 5 დაზარალებული პაციენტი (ქირურგიული ჭრილობებით და ტრავმებით). „მ.პ.ს.“ ავთიაქიდან საავადმყოფოს გადაეცა პირველი სამედიცინო დახმარების აღმოსაჩენად საჭირო მედიკამენტები, შესახვევი მასალა და სხვა სამედიცინო დანიშნულების საგნები.

ხაშურის რაიონულ საავადმყოფოში 70 დაჭრილი მკურნალობდა, აქედან 41 პაციენტი იწვა სტაციონარში, 29-ს გაეწია ამბოლატორიული დახმარება. განსაკუთრებული თავდადება და მაღალი პროფესიონალიზმი გამოავლინეს მედიცინის მუშაკებმა. „რაიონული საავადმყოფოს ქირურგიული განყოფილების გამგე ელიზბარ პატურაშვილმა სასწრაფო ოპერაცია გაუკეთა ბათუმელ ზ. ჯაყელიძეს, რომელიც ქარელის მისადგომებთან მიიმედა დაჭრიდა. საუბარი უჭირდა. მან თვალთ გვანიშნა, კალამი და ფურცელი მომაწოდეთო. მივაწოდეთ და დაგვიწერა: „ნუ ნერვიულობთ, ჩემი თავი შემიწირავს საქართველოსათვისო“ (ექიმ ლელა გოგალაძის ნაამბობი).

„ცეცხლის შეწყვიტის შემდეგ, გორისა და რუისის მიმდებარე ტერიტორიაზე, ბევრი დაჭრილი ჯარისკაცი იყო თავშეფარებული. ჩვენ სამჯერ შევედით ტყეში მანქანით და გამოგვყავდა დაჭრილი ჯარისკაცები, რომლებსაც რაიონულ საავადმყოფოში ვუტარებდით ოპერაციებს. 12 აგვისტოს, სოფელ რუისიდან მოიყვანეს მუცელში მიიმედა დაჭრილი მშვიდობიანი მოსახლე, 57 წლის უშანგი ბეროშვილი, რომელსაც გაუკეთეთ სასწრაფო ოპერაცია. გვეხმარებოდნენ ექიმები: ლელა გოგალაძე და მერაბ მუმლაძე“ (ელიზბარ პატურაშვილის ნაამბობი).

„რუისთან მომხდარი დაბომბვის დროს სამარშუტო ტაქსში 9 ადამიანი ჩაცხრილეს, მათ შორის იყო ერთი ბავშვი. რაიონულ საავადმყოფოში მიყვანის შემდეგ მხოლოდ ერთი ადამიანი გადარჩა“ (ექიმ ლელა ჭაღიაშვილის ინფორმაციით).

„თავდაცვის სამინისტროს პოსტიტალში (გორში) ომის პერიოდში იყო მთელი მედპერსონალი მობილიზებული. 6 აგვისტოდან, 5 დღის განმავლობაში, ტყვიების წვიმაში, დაახლოებით 1500-1600 დაჭრილს გაეწია პირველადი დახმარება. შემდეგ ეს ავადმყოფები იგზავნებოდნენ შესაბამისად თბილისის საავადმყოფოებში. პოსტიტალთან ერთი ბომბი ჩამოვარდა და ერთი ექიმი დაიღუპა“ (ექიმ დავით ტაბატაძის ნაამბობი).

თავდადებულ ექიმთა შორის არის ჩვენი თანამემამულე ექიმი იოსებ (სოსო) გელაშვილი (დაიბადა 1972 წელს ქ.ხაშურში. 1990-98წწ. სამედიცინო უნივერსიტეტის სტუდენტი. 1998 წლიდან 2007 წლამდე მუშაობდა რესპუბლიკურ საავადმყოფოში ქირურგად. 2007 წლიდან მუშაობს რესპუბლიკის კლინიკური საავადმყოფოს გადაუდებელი ქირურგიის დეპარტამენტის ქირურგად. რუსეთის აგრესიის დროს გამოჩენილი სიმამაცისათვის, საქართველოს პრეზიდენტის 21 აგვისტოს ბრძანებულებით, დაჯილდოებულია „ღირსების ორდენით“, აგრეთვე, საქართველოს შინაგან საქმეთა მინისტრის ბრძანებით ომში განსაკუთრებული დამსახურებული ღვაწლისათვის კი – მედლით „მხედრული მამაცობისათვის“).

აგრესიის დღეებში, ლტოლვილთა და დევნილთა რაიონული სამსახურის ინფორმაციით, ერთი თვის განმავლობაში (8 აგვისტოდან 7 სექტემბრამდე), რაიონში შემოსული იყო 11000 დევნილი ძირითადად ცხინვალის, გორისა და ქარელის სოფლებიდან. დევნილები გადანაწილებულები იყვნენ: სანატორიუმებში („მზიური“, „სურამი“, „მშენებელი“). მედლაბორატორიაში, რკინიგზის საავადმყოფოში, ბაგა-ბაღებში. (№1-ხაშური ლომოურის ქუჩა №17; №2-ხაშური ვაჟა-ფშაველას ქუჩა №27; №3-ხაშური ხეთაგუროვის ქუჩა №15; №6-ხაშური თევდორე მღვდლის ქუჩა №51; №7-ხაშური თამარ მეფის ქუჩა №17; №9-სურამში). ლტოლვილებს პროდუქტებით ამარაგებდა და სოციალურ პრობლემებს უგვარებდა გამგეობასთან შექმნილი დროებითი კომისია და შესაბამისი სამსახურები. მოსახლეობა შესადგებლობების ფარგლებში ეხმარებოდა ლტოლვილებს. იმართებოდა მათთან შეხვედრები. ისინი ყვებოდნენ ომის საშინელებებს. მათი ჩანაწერების გაცნობისას ვრწმუნდებით, რა ტრაგედია დაატყდა თავს XXI საუკუნის ქართველობას:

გაიოზ ჭავჭავაძე, 79 წლის, სოფელ ანევეში მცხოვრები: „ივლისში სოფელ ნულის მოპირდაპირე მხარეს ოსებმა მაღლობზე სანგრები გათხარეს, რომლებშიც ტანკები და მანქანები დაეტეოდა. ოსები არწმუნებდნენ ქართველებს, რომ სარწყავი არხის გაკეთებას ვაპირებთო, სინამდვილეში კი საბრძოლო არტილერიის სათავსოდ უნდოდათ. ამავდროულად, ოსი მოსახლეობა გაიხიზნა ვლადიკავკაზში.

სოფელი ნული მდებარეობს მდინარე ფრონეს მარჯვენა მხარეს, ფერდობზე. მის მოპირდაპირე მხარეს კი ოსური სოფლებია: უბიათი და ღვერთვეი.

სოფელ ღვერთვეის მახლობლად ოსი სეპარატისტების ჯარის ნაწილი იყო დაბანაკებული. 3 აგვისტოს, ოსმა სეპარატისტებმა სოფელ ნულს გაუსხნეს ცეცხლი, რომელიც სამი დღის განმავლობაში გაგრძელდა ე.ი. 3, 4, 5 აგვისტოს ბრძოლის ქარცეცხლში იყო გახვეული ნულის მოსახლეობა. დაინგრა რამდენიმე სახლი. მიიმედა დაიჭრა ნოდარ ჟამერაშვილი, დაიხოცა პირუტყვი. მეოთხე დღეს ანევეზე მიიტანეს იერიში. 6 აგვისტოს, რუსმა აგრესორებმა ანევეი დაბომბეს, უმეტესად, ხალხის თავშეყრის ადგილებს ბომბავდნენ. ამასვე აკეთებდნენ ოსი სეპარატისტებიც. განსაკუთრებით იმ ობიექტებზე მიქონდათ იერიში, სადაც ქართული ჯარი იდგა. ქართული ჯარი გამირულად უმკლავდებოდა მათ. მსხვერპლიც იყო, ანევეის მოსახლეობამ გაიხიზნა დაიწყო. 8 აგვისტოს კვლავ განახლდა დაბომბვა. სოფლის თავზე საჰაერო ბომბებს ჰყრიდნენ. ჭურვის ნამსხვრევებით მრავალი ადამიანი დაიჭრა. ჩემი ოჯახი ყველაზე გვიან გავიდა სოფლიდან.

8 აგვისტოს, იმ საშინელების დროს, ჩემი ორი შვილიშვილი გაიყვანეს სოფლიდან. დავრჩით მე და ჩემი მეუღლე (80 წელს გადაცილებული, მას სტრესის გამო, გულის შეტევა დაემართა, დღესაც ცუდად არის). ჩვენ არსად ვაპირებდით წასვლას, მაგრამ 9 აგვისტოს ისევ განახლდა დაბომბვა. ჩემს სახლს ჭურვი დაეცა, საბედნიეროდ



უვნებლად გადავჩით, მაგრამ 50 წლის განმავლობაში რაც შევიძინეთ, ყველაფერი დაკარგეთ.

ამჟამად ხაშურში ვართ. თავი შევაფარეთ, რა თქმა უნდა, დროებით, ნათესავს...”

(გაგრძელება III გვერდზე)

(გაგრძელება)

ქორა (გიორგი) თხლაშიძე, 53 წლის, სოფ. ავლევი: „2008 წლის 10 აგვისტოს სოფელში ხმა გაგრძელდა, ოსების ბანდები შემოდიანო. იმ წუთში დიდი რეაქცია არ მქონია, მაგრამ როცა რაკეტამ თავზე გადამიქროლა, მაშინ კი ვიკადრე გაქცევა. ხალხი მინდორში მოსავლის ასაღებად იყო გასული. ისინი წვილ-კივილით შემოცვივდნენ სახლებში. მე და ჩემი ოჯახის წევრები ბოსელში დავიმაღეთ. სროლები მოახლოვდა. ოსებთან ერთად კავკასიური წარმოშობის ბანდები სოფელს შემოესივნენ. ხუთი სახლი გადაწვეს. ხუთი კი - ხანძარს ძლივს გადაურჩა. გაიძარცვა ბინები, ჩემგან მანქანა და ტრაქტორი წაიყვანეს. 10-11 აგვისტოს სოფელში მხოლოდ მოხუცები დარჩნენ. მეც სიდერის ოჯახს შევაფარე თავი სურამში (კაკალათხევის უბანში), ხაჩიძეებთან. ჩემ გარდა ოჯახმა სხვა დევნილებიც შეიფარა-გორიდან და ტყვიავიდან. ჩვენ ოსებთან არაფერი გვქონდა გასაყოფი. სოფელ იონჩაში ნაკვეთებიც გვაქვს და ვმეზობლობთ კიდევ. სოფელში თანდათან დაიწყო ხალხმა ცხოვრება, მაგრამ ჯერ კიდევ დიდი შიში გვაქვს.“

იამზე ჩუტკერაშვილი 45 წლის, მათემატიკოსი, სოფელი ავლევი: „2008 წლის 8 აგვისტოს, ზნაურის მხრიდან დაიწყო შემოტევა სოფელ კნოლეზე, ავლეზე, ცერონისზე. მოხდა მასიური თავდასხმა, სახლების დაწვა, ძარცვა. ყოველივე ეს გრძელდებოდა კვირების განმავლობაში.“



იმ პერიოდში მოსახლეობა გახიზნული იყო, სოფლებში ძირითადად მოხუცები რჩებოდნენ. იმ პერიოდში იყო მორალური და ფიზიკური შეურაცხოვა, იყო დაშინებაც. სოფელ ავლევიში ადგილი ჰქონდა კაცის მკვლელობასაც, ის იყო II მსოფლიო ომის ვეტერანი ილია თხლაშიძე (87 წ.). სამივე სკოლაში არსებული კომპიუტერები, ინვენტარი, ყველაფერი გატანილია, ფაქტიურად ყველაფერი განადგურებულია. ამ ბოლოს, დაახლოებით 3-4 სექტემბერს ადგილი ჰქონდა სამარშუტო მანქანის გატაცებას, გატაცებულია მგზავრების ნივთები. დღემდე ოსი სეპარატისტები დადიან ჩვენს კუთვნილ ადგილებში, ისმის სროლები, ყოველნაირად დაუცველები ვართ. სოფელში იყვნენ შემოსულები ეუთოს წარმომადგენლები, მაგრამ შედეგი არ ჩანს.“

ნონა ინაური, 39 წლის, სოფელი მეღვრიისი: „მყავს მეუღლე და სამი შვილი. ამჟამად ვარ ლტოლვილი, მეღვრიისი დაბომბილია. არის ასაფეთქებელი კასეტური ბომბები, ჩემს ბაღში და ყველგან. ჩემი სახლი გაძარცვულია. სოფელში ძირითადად მოხუცები არიან. უმრავლესობა ოსებმა სცემეს და მოკლეს კიდევ. მეზობლის ქალი ცუდით აჩეხეს. ააწიოკეს და გადაწვეს ყველა და ყველაფერი, დაანგრეს სახლები. როცა სახლი იძულებით დავტოვე 7 აგვისტოს, მის მერე არ მენახა ჩემი სოფელი. ამასწინათ, შევიპარე სოფელში და ნერვიულობით დიდი სტრესი მივიღე. სოფელში დადიან რუსები თავისუფლად, რასაც უნდა იმას აკეთებენ, ასევე ოსები. გვეუბნებიან, კეთილი იყოს თქვენი მობრძანება რუსეთის ფედერაციაშიო. ითხოვენ სასმელს და ქალებს, ნარკოტიკებს. არ უშვებენ წითელ ჯვარსა და სხვა დახმარებებს. სოფელი ოკუპირებულია მთლიანად. სოფლიდან დაბომბვის დროს რომ მოვდიოდი, გზებზე ცვიოდა ბომბები ჩვენს წინ და უკან, გვერდზე და ა.შ.“

თერამეტი წელი ზურგით გვეჭირა სამაჩაბლო და ასე ვიცავდით ჩვენს მიწა-წყალს. ახლა, იძულებით ლტოლვილი ვარ, ჩემს სოფელში. დახოცილები თავთავიანთ ეზოებში დავმარხე. ჩემი მეუღლე რუსებს ერთი დღე დაჭერილიც ჰყავდათ. რად იცავ შენს თავს, მიწა-წყალს და სოფლიდან რატომ არ მიდიხარო? ჩემი მეუღლე სოფელს დაბომბვის დროიდან დღემდე გვერდში უდგას მოსახლეობას და ყველაფერში ეხმარება. ჩემმა მეზობელმა გვარდიელი ბიჭის ცხედარი იპოვა მეღვრიისის თავზე და იქვე დაასაფლავა (არ იციან, ვინ არის).“

ამის გარდა ჩემმა მეუღლემ-თემურ ინაურმა და მეზობლის ბიჭებმა სოფელ ყელქცეულში დაასაფლავეს გვარდიელები. სამი გვარდიელიდან ერთი ბათუმელი იყო. მაგრამ არცერთის ვინაობა არ ვიცით. ერთს თავი არ ჰქონდა, ერთს-ფეხი“.

რეზო კობაძე, 41 წლის, სოფელი დვანი: „ცხინვალში დავიბადე, ცნობილი მოვლენების დროს - 1991 წელს, ოსებმა დაგვიწვეს სახლი. მის შემდეგ ჩემს ცოლთან და ერთ შვილთან ერთად ვცხოვრობდით სოფელ დვანში. ჩვენს გვერდით, ჩემს მეზობელს ოსებმა სახლი დაუწვეს, ხანძარმა ჩვენი ბინაც შეიწირა. ამის გარდა სოფელში სკოლა და ერთი სახლიც გადაწვეს. ამჟამად აქ ვართ თავშეფარებულები. მადლობა თქვენს გამგებებს და ხაშურლებს იმ სითბოსთვის, რასაც თქვენ იჩენთ ჩვენდამი.“

ნაირა გელაშვილი, 45 წლის, სოფელი ავლევი: „ის, რაც 6 აგვისტოს მოხდა, მხოლოდ კინოებში გვაქვს ნანახი. დღესაც ვერ გამოვსულვართ სტრესიდან, თუ როგორ დაგვიშალეს და დაგვიბომბეს

რუსმა, კახაკებმა და ოსმა სეპარატისტებმა. წავდნენ, ძარცვავდნენ და იტაცებდნენ ყველაფერს, რაც კი ხედებოდათ, ამდენი ხნის გამართული სოფლებიდან.“

6 აგვისტოს დილა თენდებოდა, სროლის ხმა რომ მოგვესმა, რის გამოც აღარავის დაუძინია. იღვა სოფელი და მისჩერებოდა, როგორ წითლდებოდა ცა ტყვიებისაგან. ისმოდა შემაწუხებელი გუგუნი, რის შემდეგაც არც ჩანდა არაფერი, წამში ნადგურდებოდა ყველაფერი, სადაც კი ბომბი დაეცემოდა. რასაც მოჰყვა ხალხის შიში, რამაც იძულებული გახდა ისინი, დაეტოვებინათ თავისი ძვირადღირებული და

### ხაშური და რუსული ინტერვენცია

მხელად შექმნილი ქონება, მოუხდათ ნათესებისა და ყველანაირ მოსავალზე ხელის აღება. რის გამოც დღესაც არ ვიცით, როდემდე უნდა ვიყოთ სხვის იმედად, როდემდის უნდა ვუცქიროთ, ვინ როდის მოგვაწოდებს საჭმელს, ვინ როდის მოგვაწოდებს ყოველდღიურ ელემენტარულ რამეს, ჩვენ ჩამოგვრთვა იმის უფლება, რაც აქამდე გვქონდა, მაგრამ ჩვენ მაინც არ ვკარგავთ იმედს, ალბათ, დღეს იქნება თუ ხვალ, დავბრუნდებით ჩვენს სახლში და ვიცხოვრებთ ისევ ბედნიერად.“

მიუხედავად ამ ტკივილისა, მადლობა მინდა, გადავუხადო იმათ, ვინც გულთან მიიტანს ჩვენს გულისტკივილს და დაგვეხმარება.“

ნინო დოიჯაშვილი, 28 წლის, ერგნეთი: „დავიწყებ იქიდან, რომ ვცხოვრობდი გორის რაიონის სოფ. ერგნეთში და ვსწავლობდი ცხინვალის პირველ საშუალო სკოლაში. ეს იყო 1991-92წწ. ძალიან ბედნიერი და ხალისიანი ოჯახი გვქონდა, ვცხოვრობდით, ვმრომობდით და არც არაფერი გვაკლდა. მამა ცხინვალში მუშაობდა და კარგი ხელფასი ჰქონდა, დედა დიასახლისი იყო. სკოლაში სიხარულით მივიდიოდი ხოლმე, რომ არა ის აგბედითი ომი, რომელმაც ყველა დაგვაზარადა. მაშინდელი დრო არასოდეს დამავიწყდება. საშინლად დაიძაბა მდგომარეობა ცხინვალში, მაგრამ სწავლას განვაგრძობდით, არავის ეგონა, რაოდენ მძიმე ხვედრის წინაშე აღმოვჩნდებოდით. ჩვენი სკოლის წინ მდებარეობდა რუსულ-ოსური მეექვსე სკოლა. ოსი ბავშვები საშინელ შეურაცხოვას გვაყენებდნენ, გადმოდიოდნენ ჩვენს სკოლაში და დანებით გვემუქრებოდნენ, გვაშინებდნენ, ასფალტს ცარცით ჰყოფდნენ და ზედ აწერდნენ: „წათორიეთ, ქართველო ღორებო“. იქ ყოფნა გაუსაძლისი გახდა და ჩვენმა ნატო მასწავლებელმა გეთხოვა, სახლებში დავბრუნებულიყავით და აღარ გამოგცხადებელიყავით სკოლაში. ეს იყო ჩვენი იქ ყოფნის უკანასკნელი დღე. მაშინ კარგად არ მესმოდა, რა გველოდა, რა საშიშროების წინაშე ვიდექით. ტირილით, რის ვაივავლახით გამოვუყვეით ჩვენი სოფლის გზას. სახლში მძიმე სურათი დამხვდა: ქალები ტიროდნენ, მამაკაცები შეგროვილიყვნენ და „ბრონის ჟილეტებს“ იკრავდნენ. რაღა თქმა უნდა, ჩემთვის, ჩემი დები-სთვის და კიდევ იქ მცხოვრებთათვის ეს იყო საშინელი, სისხლიანი და ტკივილიანი წლები ჩემს ცხოვრებაში. იტაცებდნენ ახალგაზრდებს, ცვლიდნენ ტყვეებს. მახსოვს მრავალი შემზარავი ფაქტი. ერთ დღეს, რიცხვი არ მახსოვს, ჩვენს უბანში „ბეტერი“ გადავირავდა. შემოდან გვარდიის ბიჭები ისხდნენ, ჩემი კლასელიც იქ იჯდა, ერთ-ერთი მათგანი შიგ მოყვა და სიკვდილს ებრძოდა, დანარჩენები მძიმედ დაშავდნენ. საშინელი იყო მომაკვდავი ხალხის გმინვა, ის ბიჭი ადგილზე გარდაიცვალა. ცხინვალში სასტიკად აწამებდნენ ქართველებს, მნიშვნელობა არ ჰქონდა წლოვანებას და სქესს, მათთვის ყველაფერი სუფერით იყო, მათ არ უნდოდათ მშვიდობა, არ ინდობდნენ მშვიდობიან მოსახლეობას, „გუდრონიში“ ხარშავდნენ ტყვეებს და სასტიკად აწამებდნენ ჯარისკაცებს. ეს ყველაფერი ხდებოდა 1993-94 წლების ბოლომდე. ეს არ არის ჩემი მოგონილი, ეს გაგონილი და შემზარავი ფაქტებია, რომელმაც დაგვიმახინჯა ბავშვობა და შავი ლაქა დატოვა



ჩვენს მესხიერებაში. ის კი მახსოვს კარგად, როცა სოფ. ერგნეთში ოსი ეროვნების ქალი და ბავშვი ჰყავდათ ტყვეებად, უვნებელი და ხელშეუხებელი, მათ არ აკლდათ კვება და ცხელ-ცხელი ხაჭაპურები. ისე კარგად ექცეოდნენ ჩვენი თანამემამულეები, მათ სანაცვლოდ ჩვენ კი მხოლოდ ნაწამებ ქართველებს ვიღებდით. არ მესმის რატომ? ნუთუ მათ გული არ გააჩნდათ? ნუთუ არ ესმოდათ, რომ მათ ცოლებსა და შვილებს სასიკვდილოდ არავინ იმეტებდა, სანაცვლოდ რა მივიღეთ? დაკარგული ტერიტორიები და მსხვერპლი, აღარ მინდოდა ასე ცხოვრება. ყოველი წუთი შიშისმომგვრელი იყო ჩემთვის, ყოველი ახალი წელი კი - ტკივილის მომტანი. არაფერი იცლებოდა. დღე დღეს მისდევდა. ახალი წელს ცხინვალიდან, ტექნიკიდან გვიშენდნენ, აი ასე გვილოცავდნენ ყოველ ბედნიერ დღეს. შიშით და კანკალით ვამუშავებდით ნაკვეთებს და ვიღებდით მოსავალს. თავის რჩენა ხომ

(გაგრძელება)

გვინდოდა, ვერც სოფელს ვტოვებდით, რადგან არ გვინდოდა ერთი გოჯი მიწის კიდევ ერთხელ დაკარგვა. მაშინ, არა მარტო ერთმანეთს, არამედ მთელ გორის რაიონს ვიცავდით. ეს მაშინ. დღეს უკვე 28 წლის – ორი შეილის დედა ვარ, აწყობილი ოჯახი და ცხოვრება დაგვარგეთ. მართალია, 18 წლის მანძილზე ერთი დამე არ გვქონია მშვიდობიანი, სამზარეულოშიც კი გვიცვიოდა ტყვიები, მაგრამ არაფრით არ ვტოვებდით სოფელს. მიუხედავად ჩვენი მწარე ტყვიებისა და გაჭირვებული ცხოვრებისა, მაინც გვენანება ამდენი ხნის მანძილზე ნაწვლები ცხოვრების მიტოვება. რუსულმა ავიაციამ დაბომბა და მიწასთან გაასწორა ჩვენი სოფელი, ამჯერად ვერ გადავურჩით რუსი მტარვალების შემოტევას. ძლივს გამოვასწარით და მივალწით გორამდე. არაფერი წამოგვიღია, ან რისი წამოღების თავი გვქონდა?

ხაშური და რუსული ინტერვენცია

ორი დამე გორში გავათენეთ, შემდეგ, 8 აგვისტოს, გორიც დაიბომბა, აქაც უფლის წყალობით გადავრჩით და გამოვიქცეთ ხაშურში გზააბნეულები, ტირილით მივუყვებოდით ქუჩებს, მე ჩემი ორი შვილით, დედა, ჩემი და და პაპა. თურქეთისკენ მიმავალ ავტობუსს გამოვეყვით და ხაშურის შემოსასვლელში ჩამოვედით. ასე აღმოვჩნდით პირველ ბაგა-ბაღში, სადაც ამჟამად ვცხოვრობთ. დღესაც სტრესში ვართ, ბავშვები ვეღარ იძინებენ, სულ ზეცას შეჩერებინ და ყურადღებას ერთი წუთით არ ანელებენ, ომის შიშმა სამუ-

დამყავდა და ძალიან მიმიღე დღეების გადატანა გვიწევდა. გზა რომ დაიკეტებოდა, ოსი სამხედროები არ გვიშვებდნენ და ტყეზე გადავდიოდით დიდი შიშით. ცხინვალში ყურადღებას არ გვაქცევდნენ და არც საბუთს გვაძლევდნენ, რომ გზაზე ოსებს გავეტარებინეთ თამარაშენისაკენ. შემდეგ თამარაშენის გამგებელი დამეხმარა (ბატონი დავით დათაშვილი და სკოლის დირექტორი ქალბატონი ელისო ბასიშვილი). ვცხოვრობდით თამარაშენში ნუნუ მინდიაშვილის ბინაში. შემდეგ ხეითში მომცეს ბინა, აგვისტოში უნდა შევესახლებინეთ. ბავშვებს ძალიან უხაროდათ, აღარავინ დაგვჩაგრავსო, მაგრამ საუბედუროდ, 7 აგვისტოს ომი დაიწყო. ეს ომი წინა ომებზე ბევრად საშინელი იყო. გარეთ ვერ გამოვდიოდით და ვერ ვლაპარაკობდით ქართულად. დედამთილი მეზობლის ქალმა ცემა. გამოსვლა გვინდოდა, მაგრამ ყველა გზა ჩაკეტილი იყო. ცხინვალ-

იდან ოსები გადიოდნენ, ქართველებს კი არც აქეთ გვიშვებდნენ და არც თვითონ გვეხმარებოდნენ. ფეხით გამოვიპარეთ მე და ბავშვები, მაგრამ ოსებმა დაგვინახეს და მილიციამ მიყვავდით. ბიჭმა ტირილი დაიწყო, მაგრამ ვიღაც უცხო კაცი გამოგვიჩინდა და ჯარისკაცებს უთხრა, თავი დაანებეთო. მიმიღე იყო იმ დღეების გადატანა, რაც იქ გამოვიარეთ. დაგვებრუნეს უკან. სახლში ვიყავით ჩაკეტილები. გარეთ გამოსვლის გეგმინოდა. 26 სექტემბერს, წითელი ჯვრის დახმარებით ხაშურში ჩამოვედით. გამოვიარეთ დამწვარი სახლები, დანგრეული იყო მთელი ის მხარე. ძალიან გულთბილად მიგიღეს ხაშურის გამგებობაში. განსაკუთრებული ყურადღება გამოიჩინა ბადრი შერაზადიშვილმა და შეგვასახლა №7 ბაგა-ბაღში. იმედი გვაქვს ყველას, რაც გადავიტანეთ, მეტი აღარ განმეორდება.“

მზია გელაშვილი, 47 წლის, სოფელი ცერონისი: „2008 წლის 10 აგვისტოს სოფელ ცერონისში შემოვიდა ერთი ბეტეერი შეიარაღებული ხალხით (ოსები და რუსები). დაგვიწვეს სროლა, შეშინებულები გამოვიქცეთ. ბეტეერი გორაზე ავარდა და გამოქცეულ ხალხს სროლა დაგვიწვეს. ერთ საათში სოფელში ბოლი ავარდა, ჩვენ საკუთარ სახლებს ჩვენი თვალთ ვუყურებდით, როგორ იწვოდა. სოფელში თუ სახლს დაწვა მოასწრეს, რაც არ დაწვეს, გაძარცვეს, ბაღებში თუ რამე ნახეს, წაიღეს, საქონელიც წაიყვანეს. სოფელში დიდი ვიყავი-გლახით შევედი. მინდოდა, მენახა ჩემი დამწვარი სახლ-კარი. სიტყვებით გადმოცემა მიძნელებდა, რაც ჩემი თვალთ ვნახე, საშინელებაა. ყველანაირად გამართული, ავეჯით სავსე სახლ-კარი ნაცრად არის ქცეული. სახლის წინ თუ სადმე ხე, ფოთოლი, ხეივანი იყო, ყველაფერი დამწვარია, დამტვრეულია ჭურჭელი. ჩემს მეზობელს 25 სული საქონელი წაართვეს, რომ არ მიეცა, მოკლავდნენ. ჩემს უბანში არცერთი სახლი აღარ დგას, ყველაფერი მიწასთან არის გასწორებული, სახლების ადგილზე მხოლოდ ცარიელი კედლები და ნაცარია. შეიარაღებული პირები განსაკუთრებული სისასტიკით იყვნენ განწყობილნი სამხედრო ფორმაში ჩაცმული პირების მიმართ. ვისაც სახლში აღბომი პქონდა, ანადგურებდნენ. სამხედრო ფორმაში გადადებულ სურათებს ხევენ, წვავდნენ, ყრიდნენ. სოფელში დადიოდნენ და იძახდნენ: აი თქვენი სააკაშვილი და მან გიშველოთო. მე თვითონ ჩემი შვილის სამხედრო სურათი ვიპოვე ეზოში ტალახში ამოსვრილი.“

ეს ნაამბობები ძალიან მცირე ნაწილია იმ დიდი ტრაგედიისა, რაც მოხდა... მათ გარდა, უამრავი უსახლკარო ლტოლვილია, ბევრიც მარჩენალდაკარგული, ბევრი უცნობი ჯარისკაციც მიაბარეს ქართულ მიწას... მტკრმა სურვილი შეისრულა – დასავლეთისაკენ ლტოლვა არ გვაპატია.

მტერი გორისა და ქარელის რაიონების შემდეგ, 11 აგვისტოს ჩვენს რაიონს მოადგა.

რუსმა ოკუპანტებმა სოფელ ნაბახტევთან ბლოკ-საგუშაგო გახსნეს. მტრის თვითმფრინავებმა 3-4 ჯერ დახვედრეს ქალაქი. მოსახლეობა პანიკამ მოიცვა. სტალინის, იმერეთის ქუჩისა და ჭალისუბნის მცხოვრებთა დიდმა ნაწილმა მტკვარგაღმა სოფლებს შეაფარა თავი.



დამო დადი დაასვა ყველა ჩვენთაგანს. დედა სულ ტირის, გვენანება ჩვენი სოფელი, რომელსაც არაფრით არ დავთმობთ. 18 წელი იქ სულ ომში და ტირილში ვიყავი, დაგვიწვეს ყველაფერთი მოწყობილი სახლი, რასაც ამდენი წლები ტანჯვით ვიცავდით და ვუფრთხილდებოდით, ერთი ხელისმოსმით გაგვინადგურეს.“

ვერიკო ტალახაძე, 18 წლის, კნოლვე: „მინდა, გაგიზიაროთ ჩემი გადატანილი ტრავმა. მყავს მშობლები, ვართ ხუთი და და სამი ძმა. ოთხი და გათხოვილი, ერთი ძმა-დაქორწინებული. ამჟამად ჩემი ოჯახი 11 წევრისგან შედგება. 2008 წლის 7 აგვისტოს ჩვენს სოფელში შემოიჭრენ ოსები და რუსები. 8 აგვისტოს, დილის 4 საათზე, წამოვედით მე, ჩემი ძმა, რძალი და ძმისშვილები. ჩემი რძალი ფეხმძიმედ იყო და ძალიან უჭირდა სიარული. როგორც იყო, გამოვედით ცერონისამდე. მერე კი დაგურეკე ჩემს დეიდაშვილს და მანქანით გამოგვიდგა. ბავშვები და მოხუცები წამოიყვანა. გზაში კი გვხვდებოდნენ ბეტეერები, ტანკები და სასწრაფოები. მიდიოდნენ ჩვენს მხარეს, ტყვიები თავზე გვივლიდნენ, ძლივს გამოვასწარით. ერთი სიტყვით, კოშმარი იყო ეს ყველაფერი. ჩვენ რომ გამოვედით, ჩემი მშობლები არ წამოვიდნენ, სოფელში დარჩნენ, პაპაჩემი და ჩემი პატარა ძმაც. 12 აგვისტოს დილით პაპაჩემი და ჩემი ძმა წამოვიდნენ ჩვენთან. მშობლები არ გამოგვეყვნენ, ჩვენს სახლს ვერ მივატოვებთო. მერე როცა ჩვენი სოფელი დაიბომბა, დედა თავში დაიჭრა. ორი დღე გვეწვინა ქარელის საავადმყოფოში, ორი დღის შემდეგ გამოვიყვანეთ დეიდასთან-ავარაში. დროებით ვიყავით დეიდასთან, მაგრამ მერე ავარაც დაიბომბა და წავედით მთაში მთელი ოჯახი დეიდაჩემთან. ერთი კვირა დავრჩით, გზები იყო გადაკეტილი, გვეშინია ჩემი რძლის ორსულობის გართულების. ჩამოვედით ხაშურში და ვცხოვრობდით №2 ბაგა-ბაღში. 28 სექტემბერს შემეძინა ძმისშვილი ხაშურის სამშობიაროში. ამჟამად ვცხოვრობთ ლომოურის ქუჩაზე მდებარე №1 ბაგა-ბაღში.“

ნატო შალვას ასული ყულუმბეგაშვილი, 64 წლის, ცხინვალ: „ვცხოვრობდი ნათესავის ბინაში, რომელიც დაიწვა და დავრჩი დია ცის ქვეშ. დახმარებისთვის მივმართე წითელ ჯვარს, რომელმაც დაგვაკავშირა დეიდაჩემს - ნინო გრიგალაშვილს. ცხინვალიდან ჩამოგვიყვანეს გორში, გორიდან-ხაშურში. გამგებამ დიდი დახმარება გაგვიწია. მადლობა ბადრი შერაზადიშვილსა და ზურაბ აბრამაშვილს.“

ნინო გორგის ასული სადუნიშვილი, 20 წლის, ცხინვალ: „ცხინვალში მეუღლესთან და ორ შვილთან ერთად ვცხოვრობდით. ძალიან გულთბილი მეზობლები მყავდა. შვილები პირველი ომის დევნილი რომ ვიყავი, მაშინ შემეძინა ხაშურში, 1991 წელს - გოგო და 1992 - წელს ბიჭი. როცა სიტუაცია დაწყნარდა, მეუღლემ ისურვა ისევ ცხინვალში საცხოვრებლად დაბრუნება. ცხინვალში არ ჩამწერეს, რადგან ქართველი ვიყავი და შვილები ჩემს გვარზე მყავდნენ, სანამ გორში ხელი არ მოვაწერეთ.“

ხუთი წლის წინ, კიდევ მეორე ომიც გადავიტანეთ, მაშინაც გვაგიწროვებდნენ. მეუღლე ცემეს და დაინვალიდა, შრომის უნარი აღარ აქვს. 2000 წლიდან ვმუშაობდი თამარაშენის სკოლაში, ბავშვებიც იქ



ნაწილი ბორჯომ-ბაკურიანის მიმართულებით გაიქცა, ზემოსერის უბანმა კი ცედანს, წაბლოვანასა და ქემფერს მიაშურა. ბევრი ჩვენი მოქალაქე ხარაგაულის რაიონის სოფლებში დაემაღლა მტერს, ზოგიც ახლომახლო სოფლებს მიადგა. ნაირა ტაბატაძე გვიამბობს: „16 აგვისტოს ხაშურში განსაკუთრებულად მრავლად შემოვიდა რუსუ-

(დასასრული)

ლი სამხედრო ტექნიკა და ჯარისკაცები. ქალაქის თითქმის ყველა ცენტრალური ქუჩა დაიკავეს, მოსახლეობა პანიკამ და შიშმა მოიცვა. პირადად მე არ ვიცი, რატომ, მშვიდად ვიყავი. ამ დღეს ჩვენი ოჯახი ჩვეულებრივი რიტმით ცხოვრობდა. ყველაფრის მიუხედავად, არსად წასვლას არ ვაპირებდით. საღამოს, ჩვენთან მოვიდა ჩვენი ოჯახის ახლობელი და გვითხრა, მთელი ქალაქი იცლება, ხალხი გადის და იქნებ, თქვენც მოემზადოთ, მე წავიყვანოთო. წასვლა არ გვიინდობდა. შემდეგ დედამ გვირჩია, რომ მე და ჩემი და ბავშვებთან ერთად სადმე წავსულიყავით. ჩვენ სასწრაფოდ ჩავაღვარეთ ჩვენივე საჭირო ნივთები და ქვიშხეთში წავიდით და 4 დღე დავრჩით ახლობლებთან.”

ლია ჯურხაძე – ლომიძისა (აფხაზეთიდან ღტოლილი): 2008 წლის 7 აგვისტო ძალიან მძიმე გასახსენებელია ჩვენთვის. ჩვენ ვცხოვრობთ აღმოსავლეთისა და დასავლეთის დამაკავშირებელ გზაზე. მთელი ორი დღე ქართული ჯარი შეუწყვეტილ მოძრაობდა ჩვენს გზაზე. მივირბოდა, ამდენი ჯარისკაცი სად ჰყავდა საქართველოს. მძიმე საყურებელი იყო, სამხედრო მანქანებზე მსხდომი ბიჭები სიმღერ - სიმღერით რომ მიდიოდნენ ომში. ჩვენ ვტიროდით, ისინი კი გვიძახდნენ, ნუ ტირით, დაგელოცეთო, მართლაც, ყველას ჯვარს ვწერდით. განადგურებულები ვიყავით ყველანაირად. საინფორმაციო საშუალებებით ვგებულობდით, თუ როგორ უტევდნენ ქართველები მტერს. ჩემი ოჯახის წევრები ამ დღეს თბილისიდან ჩამოვიდნენ და თქვეს, გორში ძლივს გამოვიარეთო, გადაჭედებოდა ქალები სამხედროებით და პატრულებითო. დამის 2 საათი იქნებოდა, ქალაქის გამგებობიდან რომ დაგვირეკეს და გვითხრეს, ალიკო (ჩემი მეუღლე) ამოვიდეს, რეზერვისტები ვიკრიბებით და ომში მივიღვართო. საშინელება იყო ეს ჩვენთვის. ქალაქიდან იმ დამეს 280 რეზერვისტი წაიყვანეს და ყველა, ღვთის წყალობით დაუბრუნდა ოჯახებს.

ქალაქში დაძაბული სიტუაციის გამო, ოჯახში ვფიქრობდით, ბავშვები მაინც გაგვეყვანა ქალაქგარეთ. წავედით სოფელ ლაშეში (ხარაგაულის რაიონი). რამდენიმე დღე შედარებით მშვიდად ვიყავით. ამ დროს ჩვენმა მთავრობამ რეზერვისტებიც დააბრუნა ოჯახებში. 11 აგვისტოს საღამო იყო, მშვიდად ვისხედით ეზოში და ამ დროს გავიგონეთ მძიმე ტექნიკის საშინელი ხმაური, ჩვენი ეზოდან ჩანდა, თუ როგორ შემოვარდნენ სამხედრო მანქანები მძიმე ტექნიკით. ამ წყნარ სოფელში იყო პანიკა, ყვირილი. სამხედროები ყვიროდნენ, გაიქცეთო, ხალხნო, თავს უშველეთ, რუსები და ოსები მოგვდევენო. ჩვენმა ჯარმა მიატოვა შეიარაღებული ტექნიკა და ტყეში გაქცევით უშველა თავს. საშინელ დღეში ჩავეცივდით. სად გავქცევულიყავით, არ ვიცოდით, თუ სრულ გონებაზე დავრჩებოდით, ნამდვილად არ მეგონა. ასეთი საშინელება აფხაზეთის დაბომბვის დროსაც არ განმიცდია, მგონი. დავეცი მუხლებზე და ლაშის წმინდა გიორგის სალოცავს ვევედრებოდი, რომელიც სოფელს თავზე მფარველად დაჰყურებს, რომ ყველა მშვიდობიანად გადავრჩენილიყავით. ის დამე შეშინებულებმა სხვა სოფელში გავათენეთ, თუ გაათენება ერქვა. დამე მესმოდა, როგორ დაფრინავდნენ ვერტმფრენები, მაგრამ ისეთი განადგურებული ვიყავი, კიდევ გასაქცევად რომ გვქონოდა საქმე, ამის ძალა აღარ შემწევდა. როგორც კი გათენდა, მეორე დღესვე წამოვედით ხაშურში, აქაც ერთი დაძაბული დამე გავათენეთ. მეორე დღეს ისევ პანიკამ მოიცვა ქალაქი, ვითომდა რუსებმა და ოსებმა დაიკავეს ქართული სოფლები და ხალხს აწიოკებნო. ამის გამგონეს ხაშურში რა გამაჩერებდა და გავიქცეთ ახალციხეში ნათესავებთან, იმის ფიქრით, იქაც თუ მსგავსი პანიკა იქნებოდა, უკვე მეტი გზა არ გვექნებოდა და ვალეს გავლით თურქეთში გადავიდოდით. ახალციხეში ერთი კვირა დავრჩით. ამ ხნის მანძილზე ხაშურში, მართლაც, შემოვიდა რუსის ჯარი, მაგრამ ღვთის წყალობით, მოსახლეობას არ ერჩოდნენ და ჩვენც გადავწყვიტეთ, დავბრუნებუ-ლიყავით სახლში და მადლობა მინდა გუთხრა უფალს, რომ კიდევ ერთხელ აღარ გავხდი ღტოლილი. დემეტრე დალოცოს საქართველო, რათა გვაკმაროს ომი, კიდევ მსგავს ომს ვეღარ გადავიტანთ, რაც 90-იან წლებში გადავიტანეთ.”

ეთერ გელაშვილი: ომის პერიოდში მთელი ჩვენი უბანი აფორიაქებული, შეშინებული, ზურგჩანთებითა და ლეიბ-საბნებით ერთი სამარშუტო ტაქსით ბუღბუღლისციხეს მივადექით, მაგრამ ჩამოსულები არ ვიყავით მანქანებიდან, რომ ჯერ რუსების თვითმფრინავმა დაგვზვერა, შემდეგ კი ტანკებისა და მანქანების გრუხუნმა ისე შეგვაშინა, არ ვიცოდით, რა უნდა გაგვეკეთებინა. ტანკები და მანქანები ჩვენი სამხედროების აღმოჩნდა, მაგრამ ვიდრე ამას შევიტყობდით, ყველანი პანიკაში ჩავეცივდით. ცოტა რომ დაწინარდა სიტუაცია, მწვანე მონასტერში აღმოჩნდით, მოძღვარმა დაგვამშვიდა, დაგვაპურა, დაგველოცა. რამდენიმე დღე გავჩერდით, შემდეგ კი ბაკურიანში ნათესავებთან წავიდით. თან მოძღვრის ლოცვა-კურთხევასთან ერთად, საგზაოდც გავაგებანეს.”

ქენია (ევეგენია) ხაჩიძე: „სურამში, ახალ გზაზე, წმინდა გიორგის ტაძართან ახლოს ვცხოვრობთ. რიცხვი აღარ მახოვს, აგვისტო კი იყო, ხმაურმა მთელი უბანი შეაშფოთა და გარეთ გამოგვიყვანა. რუსები მოდიანო, დაიძახა ვიღაცამ და ვინ საით გავრბოდით, აღარ მახსოვს. ის დღე იყო, როცა ვაყიდან, ბერძენაულიდან და ტყვიავიდან მთელი სანათესაო მოგვადგა. ბავშვები ატირებულები, დიდები შეშინებულები და დაძაბულები ერთმანეთს ვეფარებოდით.“

როგორც აღვნიშნეთ, მტერი გომის მხრიდან შემოვიდა. ტანკები, ურალისა და ბ.მ.პ-ის ტიპის მანქანები ქალაქის შემოსასვლელში საფეიქრო-საგადაღწერიო ფაბრიკასთან, ავტოსადგურთან, გაგარინის მხარეს, ე.წ. 220-იან ელექტროსადგურთან და სოფელ იტრიასთან დადგა.

მტერმა ოსიაურის ბაზიდან ჯერ სულ გაზიდა სამხედრო ტექნიკა, შემდეგ მთლიანად გაანადგურა დარჩენილი ინფრასტრუქტურა, მათ სამხედრო ტექნიკა ხცისის მიდამოებში ეგულებოდათ და აფეთქებებსაც იქ ახორციელებდნენ. მათ გაანადგურეს იქ არსებული რეზერვისტთა ბანაკი.

21 აგვისტოს ძლიერი აფეთქება იყო ქალაქ ხაშურის სამხრეთითაც.

### ხაშური და რუსული ინტერვენცია

აფეთქების ხმა ხალხს შიშის ზარს ცემდა, ზანზარებდა მრავალსართულიანი ბინები, იმსხვრეოდა მინები. რუსები თავისუფლად გადაადგილდებოდნენ რაიონში ტანკებით და ჯავშანტანსპორტიორებით და ზვერავენენ ყველა კუთხე-კუნჭულს. სნაიპერი იჯდა პროკრედიტბანკის შენობის სახურავზე.

ომმა გამოავლინა ქართველთა არნახული სიყვარული თავისი ქვეყნისა. გვეყავს სხვადასხვა მედლით დაჯილდოებული ჯარისკაცები. მაგალითად, კაპიტანი გიორგი ტაბატაძე დაჯილდოებულია მედლით „მხედრული მამაცობისათვის“ (იგი დაიბადა ქ. ხაშურში, 1980 წელს. 1986 წლიდან სწავლობდა რკინიგზის №4 საშუალო სკოლაში. სწავლობდა საქართველოს კადეტთა კორპუსში.

მისი დამთავრების შემდეგ უგამოცლოდ ჩაირიცხა საქართველოს გაერთიანებულ სამხედრო აკადემიაში. 2001 წელს მიენიჭა უმცროსი

ლეიტენანტის წოდება. ამჟამად მუშაობს გორის სატანკო ბატალიონის ასეულის მეთაურად – კაპიტნის თანამდებობაზე. 2008 წლის რუსეთ – საქართველოს ომის დროს დაიჭრა, ამჟამად მწვობრშია.

მრავალი სიგელითაა დაჯილდოებული კაპიტანი ნოდარ თეიმურაზის ძე წულუისკირი. (იგი დაიბადა 1980 წ. თბილისში, 1997 წელს დაამთავრა რკინიგზის №4 საშუალო სკოლა, ხოლო 2002 წელს თავდაცვის ეროვნული აკადემია. სწავლობდა თურქეთის რესპუბლიკის ჟანდარმერიის ოფიცრის უმაღლეს სასწავლებელში (ქ.ანკარა), მის შემდეგ სწავლა გააგრძელა კომანდოს სასწავლებელში, რომლის სრული კურსი დაამთავრა 2006 წ. ამჟამად მუშაობს საჩხერის სამთო ბატალიონის სამსახურის უფროსად.)

ჩვენი რაიონიდან ორდენებზე წარდგენილი არიან ლეიტენანტი ზოია კურტანიძე და უფროსი სერჟანტი თეიმურაზ ბუხრიკიძე, რომლებმაც მტრის რამდენიმე თვითმფრინავი ჩამოაგდეს.

ზოია კურტანიძე: „ქვეყანას თუ დასჭირდა, უკან არაფერზე დავიხევე. ურთულესი პროფესიის მიუხედავად, არჩევანი უკვე გავაკეთე და ამიტომაც მშვიდობიან პირობებში ომისათვის ვემზადები. საჭიროების შემთხვევაში მზად ვარ, ჩემი მოვალეობა პირნათლად შევასრულო.“

ეს სიტყვები მან ერთ-ერთ ინტერვიუში თქვა, ომამდე რამდენიმე დღით ადრე. (იგი დაიბადა 1986 წელს, ქ. ხაშურში. წარჩინებით დაამთავრა ქალაქის III საშუალო სკოლა. ასევე წარმატებით დაასრულა თბილისის ტექნიკური უნივერსიტეტი. 2007 წელს მონაწილეობდა ტელეპროექტში „ყაზარმა“. პროექტის შემდეგ შემოთავაზებამიილო სამხედრო აკადემიაში სწავლის გასაგრძელებლად, რომელზეც დათანხმდა. დაამთავრა სახენიტო-სარაკეტო დანადგარების ექსპლოატაციის ფაკულტეტი, მინიჭებული აქვს ლეიტენანტის წოდება.)

უფროსი სერჟანტი თეიმურაზ ბუხრიკიძე ასე ახასიათებს ომში მეტროდ ბიჭებს: „სანამ მტერთან პირისპირ ვიბრძოდით, ქართველი ჯარისკაცის შეშინებული სახე არ მინახავს. მოწინააღმდეგესთან ბრძოლისას დიდ ფსიქოლოგიურ უპირატესობას ვგრძნობდით“ (თეიმურაზ ბუხრიკიძე დაბადებულია 1983 წელს, სოფელ ოსიაურში, დამთავრებული აქვს ოსიაურის საშუალო სკოლა, შემდეგ წელია, სამხედრო სამსახურშია. სპეციალობით მეხენიტე. მსახურობდა ერაყში.)

სხვა ბევრი ჯარისკაციც იბრძოდა გმირულად, მაგრამ ყველა არ დაბრუნებულა შინ.

დაღუპულთა შორისაა დავით ბლიაძე (დაბადებული 1986 წელს, ხაშურის რაიონის სოფელ ქვიშხეთში. მან 1999 წელს დაამთავრა ქვიშხეთის საშუალო სკოლა. 2003-2005 წლებში სამხედრო-სავალდებულო სამსახურში იმყოფებოდა ოსიაურში. 2006 წელს ჩაირიცხა რეზერვისტო ბანაკში. გარდაცვალების შემდეგ დაჯილდოებულია ვახტანგ გორგასლის ორდენით. ასევე მასავით ახალგაზრდა დაიღუპა ზაზა (ზაურ) მახარაშვილი. (დაბადებული 1986 წელს, სოფელ ოსიაურში. სწავლობდა ოსიაურის საშუალო სკოლაში. ომამდე, 9 თვის ადრე, იმყოფებოდა ერაყში, შემდეგ მსახურობდა კომანდოს ბატალიონში. 2008 წელის აგვისტო-სექტემბერში გაწვეული იყო ვაზიანის №4 ბატალიონის №41 ბრიგადაში.)

დაღუპულთა შორის აღმოჩნდა (მოგვიანებით დადგინდა დ.ნ.მ. ანალიზით) გიორგი წიქარიშვილი (დაბადებული ხაშურში, სწავლობდა ხაშურის V საჯარო სკოლაში. უცოლშვილო).

რუსმა ოკუპანტებმა 22 აგვისტოს დატოვეს ჩვენი ქალაქი, ხოლო 8 ოქტომბერს გააუქმეს სოფელ ნაბახტევთან უკანონოდ გახსნილი ბლოკსაგუშაგო. რაიონში არ დაფიქსირებულა მარადიურობის არცერთი ფაქტი, „მრავალმა ანგელოზებმა დაგიფარა.“

P.S. ომის დღეებში სამაჩაბლოდან გამოდევნილი მოსახლეობა ჩვენმა რაიონშიც მიიღო და მათი დიდი ნაწილი ზაგა-ბაღებსა და სანატორიუმებში ჩაასახლა. პირველივე დღეებში შევხვდით ლტოლვილებს, მივეფრეთ, ვანუგეშეთ, შეძლებს დაგვარად დავხმარეთ და დიდი გულიანტყვილით ჩავიწერეთ მათი მონათხრობები ომის შესახებ. მოვინახულეთ დაღუპულების საფლავები ზაზა მახარაშვილისა \_ ოსიაურში, დავით ბლიაძისა \_ ქვიშხეთში, გავეცანით მათ ოჯახებს.

ჩვენმა თანამშრომელმა გვიამბო ყმაწვილი ბიჭის (ნიკა ნოზაძის) შესახებ, რომელმაც თავგანწირვის ფასად დააფიქსირა მტრის პოზიციები ჩვენს ქალაქში და გაჩნდა გამოფენის მოწყობის იდეაც. მოვიძიეთ ფოტო \_ მოყვარულების მიერ გადაღებულ (ზ. შერაზადაშვილი, დ. ლოლობერიძე, ზ. წიქრიძე) ფოტოები და ოპერატიულად გავხსენით ფოტო-გამოფენა სახელწოდებით \_ „მრავალმა ანგელოზმა დაგიფარა“ - (რუსეთიდან გამოგზავნილი მესიჯის მიხედვით).

გადავიღეთ მოკლემეტრაჟიანი ფილმი (რეჟისორი დავით ლოლობერიძე). გამოფენაზე მოვიწვიეთ დაღუპული ბიჭების ოჯახის წევრები, ლტოლვილები, სამხედრო ნაწილისა და კომისარიატის ხელმძღვანელები პირები, ლეიტენანტი ზოია კურტანიძე, რაიონის ხელმძღვანელობა და ხაშურის საზოგადოებრიობის წარმომადგენლები.

მაყვალა ხაჩიძე, ხაშურის სამუხეუმო გაერთიანების გამომცემლობის მენეჯერი

# ხაშურის მუნიციპალიტეტის საკრებულო განკარგულება № 75

2018 წლის 7 აგვისტო, ხაშური

ხაშურის მუნიციპალიტეტის ადმინისტრაციულ საზღვრებში დასახლების შექმნის შესახებ წინადადების მოწონების თაობაზე

ხაშურის მუნიციპალიტეტის საკრებულოში შემოსულია ხაშურში მცხოვრები მოქალაქეების 2018 წლის 9 ივლისის კოლექტიური განცხადება, მუნიციპალიტეტის ადმინისტრაციულ საზღვრებში დასახლების შექმნის, დასახლებისათვის შესაბამისი კატეგორიის მინიჭების, დასახლების ადმინისტრაციული საზღვრების დადგენისა და დასახლებისათვის ისტორიული სახელწოდების „აზარმა“-ს დარქმევის მოთხოვნით.

ხაშურის მუნიციპალიტეტის მერის 2018 წლის 19 ივლისის 03/7586 წერილის მიხედვით, საკრებულოს მიერ ზემოხსენებული წინადადების მოწონების შემთხვევაში, მერია უზრუნველყოფს დასახლების ადმინისტრაციული საზღვრებისა და სქემატური რუკის მომზადებას, ხოლო საკრებულოს სივრცით-ტერიტორიული დაგეგმარებისა და ინფრასტრუქტურის კომისიის 2018 წლის 7 აგვისტოს დასკვნის შესაბამისად, საკითხი შეესაბამება მოქმედ

კანონმდებლობას. ხაშურის მუნიციპალიტეტის საკრებულოს 2018 წლის 7 აგვისტოს სხდომაზე მოწონებული იქნა ზემოხსენებული წინადადება.

საქართველოს ორგანული კანონის „ადგილობრივი თვითმმართველობის კოდექსის“ 61-ე მუხლის 1-ლი და მე-2 პუნქტების, „დასახლების შექმნისა და გაუქმების, დასახლებისთვის შესაბამისი კატეგორიის მინიჭებისა და შეცვლის, აგრეთვე, დასახლების ადმინისტრაციული საზღვრების შეცვლის წესების დამტკიცების შესახებ“ საქართველოს მთავრობის 307 დადგენილების მე-5 მუხლის მე-6 პუნქტის „ა“ ქვეპუნქტის შესაბამისად, ხაშურის მუნიციპალიტეტის საკრებულო ადგენს:

1. მოწონებული იქნას ხაშურში მცხოვრები მოქალაქეების 2018 წლის 9 ივლისის წინადადება მუნიციპალიტეტის ადმინისტრაციულ საზღვრებში დასახლების შექმნის, დასახლებისათვის შესაბამისი კატეგორიის მინიჭების, დასახლების ადმინისტრაციული საზღვრების დადგენისა და დასახლებისათვის სახელწოდება „აზარმა“-ს დარქმევის შესახებ;

2. განკარგულება ძალაში შედის ხაშურის მუნიციპალიტეტის საკრებულოს ვებ-გვერდზე [www.khashuri.org.ge](http://www.khashuri.org.ge) გამოქვეყნებისთანავე;

3. განკარგულება შეიძლება გასაჩივრდეს დაინტერესებული პირის მიერ მისი გაცნობის დღიდან ერთი თვის ვადაში, სარჩელის წარდგენის გზით ხაშურის რაიონულ სასამართლოში (მის: ხაშური, მერაბ კოსტავას ქ. №15).

საკრებულოს თავმჯდომარე

მიხეილ ჯანაშვილი



## გაფორმდა მემორანდუმი

ხაშურის მუნიციპალიტეტის მერიასა და საქართველოს ონკოლოგიურ პათოლოგიათა პრევენციის ფონდს შორის გაფორმდა მემორანდუმი, რომელიც მიზნად ისახავს ურთიერთთანამშრომლობას მუნიციპალიტეტის მოქალაქეთა საკეთილდღეოდ.

ხაშურის მუნიციპალიტეტის მერმა გიორგი გურასპაშვილმა მადლობა გადაუხადა საქართველოს ონკოლოგიურ პათოლოგიათა პრევენციის ფონდის ხელმძღვანელს მარიამ შელეგიას 3 აგვისტოს ჩარებული მოსახლეობის უფასო გასინჯვების აქციისათვის, რომელშიც მონაწილეობას იღებდნენ კ. ერისთავის სახელობის ექსპერიმენტული და ქირურგიის ეროვნული ცენტრის წამყვანი სპეციალისტები.

ქალბატონმა მარიამმა მზადყოფნა გამოთქვა მომავალშიც განახორციელოს ამ ტიპის აქციები და აღნიშნა ხაშურის მუნიციპალიტეტის მერიის ხელმძღვანელობის მიერ აქციის ინფორმაციული და ტექნიკური უზრუნველყოფის მაღალი დონე, რისთვისაც მადლობა გადაუხადა მუნიციპალიტეტის მერს.

## მუნიციპალიტეტის მერიის განცხადება

ხაშურის მუნიციპალიტეტის მერია ეხმაურება ტელეკომპანია „თრი-ალეთის“ ეთერით გასულ სიუჟეტს, რომელიც ცხოველთა მიმართ არა-აპუმანურ მოპყრობას ეხება. გვინდა, ხაზგასმით განვაცხადოთ, რომ ჩვენთვის ძალიან მნიშვნელოვანია თითოეულ მუნიციპალურ დაწესებულებაში არსებული მდგომარეობა და თითოეული თანამშრომლის დამოკიდებულება მათზე დაკისრებული მოვალეობების მიმართ.

ამიტომ, ხაშურის მერია დაუყოვნებლივ და დიდი ყურადღებით შეისწავლის ცხოველთა თავშესაფარში არსებულ მდგომარეობას და სრული პასუხისმგებლობით ვაცხადებთ, რომ ჩვენი რომელიმე თანამშრომლის მხრიდან სამსახურებრივი გულგრილობის თუ სხვა გადაცდომის შემთხვევაში, ყველას პასუხი მოეთხოვება მთელი სიმკაცრით.

მუნიციპალიტეტის მერია

## გაიხსნა რეპრესირებულთა და აგვისტოს ომისადმი მიძღვნილი მუზეუმი

9 აგვისტოს, ხაშურის მუნიციპალიტეტის მთავარი ბიბლიოთეკის შენობაში სარდაფში გაიხსნა რეპრესირებულთა და აგვისტოს ომის მონაწილეთა ხსოვნისადმი მიძღვნილი ოკუპაციის მუზეუმი.

მუზეუმის გახსნის პარარელურად, აგვისტოს ომის 10 წლისთავთან დაკავშირებით გაიმართა ღონისძიება. ღონისძიებას ესწრებოდნენ: საქართველოს პრეზიდენტის ადმინისტრაციის, შიდა ქართლის გუბერნატორის ადმინისტრაციის და ადგილობრივი ხელისუფლების წარმომადგენლები, ასევე მეგობრობის ხიდი -ქართლოსი-ის წარმომადგენლები და დაინტერესებული პირები.



## D ამირან ბარბაქაძის გახსენება

ჩემო უკვდავო ძაო, რამდენი 9 აგვისტოც არ უნდა გავიდეს, შენ ჩემთვის ხარ განუყოფელი და უძვირფასესი ჩემს გულში. მართალია, ასაკი მეც მომემატა, მაგრამ სულ მარტო დაგრჩი, მშობლებისა და და-ძმანის გარეშე... შენ ხომ ჩემთვის აღმზრდელი, მამაც და დამრიგებელიც იყავი, შენი ავტორიტეტით და კაცობით დღესაც ვსარგებლობ ცხოვრებაში და ეს მემამეა, შენ არმია ვკავდა სამეგობრო წრიდან, მაგრამ არ დამემდურებო გარკვეულ პიროვნებებს თუ არ დავასახელებ. ჩემთან შეხვედრებში თბილად გიხსენებენ ბატონები რეზო ინასარიძე, რობერტ სუხიაშვილი, ნუგზარ რამიშვილი, ომარ ღონდაძე, ბათუ ნოზაძე და უამრავი სხვა...

ჩემო ამირან, დიდ პატივს მივაგებ შენს წარსულს და ასე მოკლედ შემოვიფარგლები და ჩემს გულში დარჩები, როგორც მშობელი და უდიდესი პიროვნება, შენი განათლებით და ერულით. ტკბილად იძიებ შენს სასუფეველში. შენი ბატარა ძმა ონანა (ომარი)

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.

E-mail [Khashurismoambe2015@gmail.com](mailto:Khashurismoambe2015@gmail.com) მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.

♣-ით მონიშნული სტატია იბეჭდება დაკვეთით გაზეთი იბეჭდება თბილისში. რედაქტორი რობერტ სუხიაშვილი.